

關盼
盼

燕子樓

玉生香傳奇之四

閩縣之傳奇

燕窩樓

惜陰署



莊	碧
石	梧
印	山

序

僕嘗客遊汴水道出彭城緬西楚之故都溯東坡之舊治
馬不戲而臺冷鶴已去而亭空則且訪列戟之官衙訊賜
鞭之節度亦復琴尊久闕劍舄長韜珠箔烟飛金釵雲散
認取牆邊苔礎空想鴛棲墮來梁上芹泥如聞燕歎此所
以紀遊有作而懷古獨深也毘陵陳君叔明品重琳琅才
羅錦繡倚新聲於玉樹白首能狂摹豔體於金荃紅牙頻
拍所著有傳奇四種燕子樓其一也弔淒涼之碧血易冷
空山傷窈窕之紅顏難填巨海腸斷舍人短句儘帶拋衫

棄莫諒苦衷心銜故主深恩倘粉殉脂埋恐妨清範抽毫
寫怨爲傳夜狄之吟擁髻含顰曲繪春蠶之死樓無百尺
筆有千秋嗟乎鸞鏡塵封烏衣夢斷話鰥鵲身世居然操
凜霜筠數鷓鴣光陰久矣命輕風絮試撫姬姜軼事何慚
名教完人固宜證彼蘭因付諸菊部么鳳之妍詞乍按元
龍之豪氣都除銀燭光中君成晚翠寒香之傳銅絃聲裏
我服漢卿仁甫之才吳縣俞廷瑛序

序

潛翁旣感仙猿之異辨蜀錦之誣載闡幽芬三疊雅奏稽
唐代之軼事衍長慶之清詞復成燕子樓院本十六折以
授學瀚綴辭卷端學瀚未能識曲敢附知音方陽春之寡
和幾游夏之莫贊第夙覽唐賢所述久軫於懷真想斯欽
誦言曷已夫質抱金石非託響於拂羽懸黎樂播管絃必
選材於龍門孤竹是以飲冰茹蘖節操盟其素心結蘅愛
荃詠歌寄之彤史豈女德之不爽亮閨怨之易工至閒情
宛轉流爲倚聲綺語纏綿極於侔色雖有作者可無論已

乃或悲哀爲主徒留離恨之天或寂寞求音莫識埋憂之
地商羽流徵輦悅揚華從未有驚才絕艷蘊志含貞曠禮
之戒媿於敬姜秉心之勛同於仲氏如盼盼其人者潛翁
詩徵本事劇合定場締品豔於夢因結憐香於感舊雙飛
覩燕十載殉樓固不待抽祕騁妍可信其識高意遠也嗟
乎玉帳建牙控上游而作鎮金臺買骨開東閣以延賓月
冷星沉風流雲散銀刀跋扈幾覆司徒之宗華屋淒涼空
到洛陽之墓未廣孝標絕交之論翻來魏武分香之嘲豈
知黃金不惜賸有蛾眉紅粉未灰啼成鵲血詩人老去詎

同飄泊之楊枝公子安歸不比倉琅之燕尾須臾忍死恐
累平生老嫗猶能解詩舍人竟難會意情深兒女識過鬢
眉始信小家碧玉報主身輕足令司馬青衫聞聲淚溼矣
獨是空樓望斷已成化石之形寡燕聲銷幾等銜碑之口
不藉文人之筆誰傳名媛之才非特紅豆譜成表微足稱
知己卽白楊和寄作歌亦以告哀貞魄有靈珊珊影如見其
有不激楚於生前欣慰於身後也乎然而填海之禽長恨
未解呼名在爨之桐半焦何心入聽况玉簫蛛網不冀再
生之緣錦瑟蠶絲豈有華年之憶清名無玷信史報以千

秋素志旣伸泉臺隨於司日遺詩三絕長留天地之間奇
烈孤蹤足壯閨幃之色是則詩吟太傅教成歌舞唐突應
媿失言曲記中郎演向氍毹揣摩尙嫌多事質諸潛翁當
亦拊掌掀髯其謂惠子之知言抑笑豐干之饒舌也光緒
乙酉六月同里汪學瀚序

題詞

尙書門第慘斜暉
賸有斯樓燕獨歸
無數花間舊蜂蝶
春來何處不雙飛

紅線重來意倍親
當年汝亦此嬉春
祇今同病相憐甚
不話傷心與別人

一死非難獨處難
十年耐盡舞衣寒
如何杜宇催歸急
不信樓中燕子單

彩筆才人替寫生
孤棲心事更分明
四絃秋裡琵琶語
尙是空牀蕩婦情

曲阿束允泰季符

旌節花寒夜隕霜霓裳舞罷泣空牀可憐一片彭城月流
照繁華影不長

宛轉愁腸日九回舍人偏又寄詩來蛾眉一死尙書玷不
是春心不肯灰

小樓一角賸荒烟燕子飛來亦黯然賴有紅牙收拾得牡

丹春色似當年

用香山詩原韻

平江俞廷瑛筱甫

尙書舊宅美人樓燕子芳名自昔留忠節從來爭一死幾

人到此猛回頭

願作鴛鴦不羨仙

成句

追思往事淚潸然春來燕子秋來月

伴妾空閨十一年

多情感舊復憐香淚溼青衫白傳狂譜出梨園新樂府風
流玉茗擅詞場

受業左運昌子鳴

東洛星芒大幕寒幾回腸斷淚汎瀾劇憐夜月空堂燕無
復書傳郭紹蘭

十年幽獨伴樓居釵股分將玉匣儲紅杏花時春寂寂不

堪回憶老尙書

彭城遺蹟尙依然賴有文人彩筆傳讀罷衍波三十幅好
憑往事勘情禪

受業吳彬華序東

烏衣門巷弔斜陽寂寂幽魂千載芳蝶夢至今尋廢苑燕
泥終古落空梁青衫應溼離筵淚紅豆初拈記曲娘多少
英雄兒女事但憑長笛譜伊涼

同里李寶章斐園

畫樓高高傷獨處燕睇珠簾學人語不訴繁華祇訴愁悽

絕當年浣紗女朱門冷落海樣深翠蛾蟬鬢俱銷沉樓空
皎月白於練照見冰霜一寸心寸心甘爲主恩死十載單
棲守孤壘憑他對乳話呢喃從今豔福拋羅綺尙書墓上
風雨哀紙錢冑樹飛寒灰黃金不惜買紅粉玉骨自合理
蒼苔香魂一去絕消息紫鴛歸來尙相憶梨園爭唱燕子
箋疇爲貞姬寫顏色陳髯健筆天賦成含宮咀徵別有情
紅牙拍到斷腸處猶帶樓中嗚咽聲江左風流盛歌舞烏
絲院本從頭譜王謝堂前幾度聞香巢繡幕皆新主勞燕
分飛春復秋忍教烈性付東流憑將寡鵠孤鸞曲演出彭

城第一樓

任邱邊保樞竺潭

玳瑁梁空鴛鴦夢醒廿年人老樓中閉了閒門任他蛛網
塵封捲簾肯放雙飛入有一襟憔悴孤紅算繫來縷縷長
繩歲歲相逢天桃不短今生命比綠珠慘墜特恁從容
有甚商量怕聽軟語惺忪穠醪三尺淒涼色最難傳冷雨
淒風怕新詞唱到秋宵欲遣玲瓏

調寄高陽臺

旌德江順詒秋珊

花落東風卷忍教他歸來燕子更無人管賸粉遺香留得

在舊恨新愁欲翦誰擘破同心珍繭好待詞壇和淚織一
絲絲譜出情深淺千古恨幾時展美人塵土空名顯記
樓頭蛾眉峯蹙翠鬟雲扁欲挂簾鉤人怕倚夜月休教照
遍恩與怨從來未免濺得江州衫上淚訴相思不盡心難
轉多薄命韋腸斷

調寄金縷曲

受業劉杓吉六

繁華夢醒悵今生緣短玳瑁梁空悄誰喚賸愁儂獨自樓
鎖春深拌不惜顚顚當年人面畫簾閒半捲燕子歸來
雙宿雙飛怕儂見紅縷尙依然軟語呢喃依稀是憐儂無

伴算只有詞人識儂心好譜入歌絃替儂傳怨

調寄洞仙歌

受業劉炳照光珊